

本朝分省人物考

分省人物考目錄卷之七十五

福建漳州府

林弼

呂宗爵

胡宗華

郭惠

劉宗道

林瑜

鄭深道

戴泰一

王源

朱瑤

蘇原芳

王昇

顏寶

陳旺

林震

陳亶

潘榮

林京

王玄弼

唐孟元

莊伯和

周宣

歐輝

鄭和

張寬

盧元

郭舒

吳森

陳爵

林同

吳原

陳宏

陳真晟

魏富

沈源

許潛

吳環

吳玘

林魁

洪異

劉友仁

楊表

林梅

林士章

胡春同

李誠之

福寧州

周斌

林拱

陳琦

陳錡

孫賦

林聰

本朝分省人物考卷之七十五

福建漳州府

林弼

林弼龍溪人元至正中進士有文詞著聲閩浙間仕爲郡幕官入本朝與修元史授考功主事使安南贐以金珠弗受其王強致之旣還悉獻于朝朝廷嘉之賜以白金尋命知豐城有善政後爲考功郎中出爲登州知府所著有文集

呂宗爵

呂宗爵其先晉江人洪武初避寇來漳家于龍溪之

觀林兄弟四人宗爵居長性純篤有孝行父疾夙夜扶持奉湯藥父洩痢必躬滌廁澣衣歷十餘年孝敬彌篤父歿持喪盡禮母先卒時家貧葬不能備禮至是啓之重斂易棺與父同窆鄉黨咸稱其孝

胡宗華

胡宗華龍溪人玩心理學言行爲鄉邦楷式洪武三年以明經薦訓導郡庠講說經籍闡析微奧教導諸生以身爲範卒以仲子宜衡恩贈中書舍人

郭惠

郭惠字邦文龍溪人居家孝友嘗著兄弟訓立義學

重義輕財爲鄉邦推重洪武間郡守白壽以學行舉授府學訓導訓迪有方陞廣東保昌縣學教諭以外艱改增城增城遐僻人不知學乃擇少俊十數人晝夜爲之講解疊疊不倦其後與薦書者七人終瓊山縣學教諭卒

劉宗道

劉宗道龍溪人洪武壬戌徵秀才八千餘人入試朝政宗道第一仍命學士詹徽密察諸儒中特異者復居德行第一以布衣侍坐共論治道拜都察院左都御史條上二十事言甚切直上命所司採行

林 瑜

林瑜龍巖人洪武中由太學生授五軍斷事卓有才
譽遷江西按察司僉事永樂中陞副使居官平恕所
至民多德之後陞浙江左叅政卒于官

鄭深道

鄭深道龍溪人由鄉貢兩任典教五司文衡未嘗有
過舉洪熙元年授司經局校書陞梁府紀善 勅褒
之有曰文學老成操履清慎累承 仁廟諭問及賜
膳侍宴尋致仕卒八十有二

戴泰一

戴泰一龍溪人才行敦篤永樂元年郡守錢古訓以
茂才薦授直隸和州知州恪慎有爲以清白稱卒于
官

王源

王源龍溪人永樂初進士爲庶吉士歷官兵部職方
郎中廣東潮州府知府所至有聲平生勤學能文旣
致仕年及八十猶手不釋卷所著有韋庵集并家禮
易覽

朱瑤

朱瑤龍溪人永樂初郡守錢古訓以茂才薦授鄒縣

知縣公勤廉幹賦役均平秩滿邑人奏留者再卒于官爲築墳立祠歲祭之

蘇原芳

蘇原芳龍溪人持重好禮事母極孝以田讓與弟絕無吝色鄉邦咸敬慕之永樂初以懷材抱德薦有司敦促就道未行卒于家

王昇

王昇龍溪人永樂甲申進士入翰林爲庶吉士出宰安福羅田二縣俱有惠政改平涼府推官轉大理評事尋遷寺正審讞平允陞知撫州府賜勅給驛之任

蒞政以寬待士以禮催科恕撫字勤秩滿郡民上疏
乞畱 上允之增正三品秩仍知府事三年 賜誥
贈其父母未幾乞致仕卒

顏寶

顏寶龍溪人永樂丙戌進士授四會知縣溫厚公正
寬猛得宜奏除詭名田糧九百餘石復申除鄉民鹽
鈔一十二萬餘貫尤篤意學校爲新其廟宇至於橋
梁圩岸之屬亦悉意繕治藩臬郡守交章論薦稱爲
嶺南獨步遷秩而去邑人慕之

陳旺

陳旺龍溪人性豪縱不羈亦聰明強記博通子史領
永樂甲午鄉薦授國子助教改常州府學教授司廣
東鄉試禮部奏聞旺善屬文尤精于書卒于官常之
門人顧言刻其文集若干卷傳于世

林震

林震長泰人性質穎悟問學該博宣德庚戌科進士
第一人授翰林修撰以疾歸卒于家人咸悼惜之

陳亶

陳亶漳浦人正統初進士累官吏部考功郎中遷廣
東左布政使寬而不縱嚴而不苛文章政事爲時推

重致仕家居十二年卒所著有梅庵存稿經籍要覽
藏于家

潘榮

潘榮字尊用龍溪人正統甲子舉福建鄉貢戊辰登
進士第奉命齎銀幣犒師廣東景泰庚午拜吏科
給事中彈駁有體論停起復抑奔兢數事尤剴切多
見嘉納壬申陞左給事中充荊府冊封副使不受餽
遺甲戌歸省賜楮幣爲道里費未幾值父喪毀瘠骨
立事母不離側天順己卯始以服闋復任辛巳充蜀
府冊封副使如使荊時壬午簡充琉球國冊封使

賜麒麟衣玉帶以行至則奉宣德意王以下皆竦息
聽命陪臣請爲中山八景記援筆立就有用夏變夷
語國人爲之刻石甲申還朝陞吏科都給事中以母
喪歸如喪父時成化己丑復任庚寅陞南京太常寺
少卿丙申陞南京戶部右侍郎戊戌奉勅總南京
糧儲尋改都察院右副都御史仍領其事辛丑召入
爲戶部左侍郎適尚書缺遂署部事免兩浙償補鹽
課人皆稱便會久旱漕河淤涸奉命督治運舟畢
至甲辰陞南京戶部尚書所出政令大抵以節財卹
民爲務丁未孝廟登極以老疾懇辭給驛以歸弘

治丙辰卒年七十有八贈太子太保

林京

林京龍巖人故叅政瑜之子好讀書每觀史至忠臣義士輒撫卷歎慕正統丁卯沙尤賊逼縣境京團結鄉民佐官軍守邑城力不能敵偕其子綬間道走郡城請援至龍門里上坪爲賊所獲脅使拜跪京不從賊怒欲殺之京瞋目詬曰吾頭可砍膝不可屈顧謂綬曰人生當知順逆吾與汝寧死于此毋爲反賊所脅以虧忠義遂與綬皆遇害賊去鄉人義而哀之求其屍於暴骸中面目如生乃具棺殮瘞于死所

王玄弼

王玄弼龍巖人正統丁卯沙賊楊福寇縣民逃避林谷死者甚夥時玄弼父與繼母及弟先避難漳城賊勢既逼玄弼與兄用享不得出境遂走邑之上坪其兄爲仇家所知欲搜殺之玄弼自謂曰我有子三人俱長兄惟一子尙幼我出兄必得免庶老親有所托也遂出懷訴于賊以身代兄死聞者義之

唐孟元

唐孟元龍溪人正統戊辰叛賊寇掠郡邑多脅良民從亂孟元泊其弟孟遠與衆誓曰吾黨俱良民豈可

從賊比賊至孟元兄弟先率衆據橋拒戰賊不得進
自辰至酉衆見賊益增勢不能敵欲退走孟元乃告
其弟曰爾可去以奉先祀我當以死敵之賊勢稍緩
鄉人得登舟脫免孟遠曰吾兄方危急吾何忍去遂
輔孟元力戰同死於賊鄉人哀之

莊伯和

莊伯和龍溪人正統十四年爲鄧茂七賊黨所獲至
赤嶺賊首張永瑞欲脅之使從伯和憤罵曰汝等不
顧天理不懼國法而悖逆如此我爲 聖朝良民安
肯從汝賊邪賊見其仗義不忍殺拘之三日仍迫以

威伯和罵益甚遂受戮而死

周宣

周宣字政舉龍溪人正統間進士授戶部主事遷潮州府知府時潮寇竊發宣以計招捕平之改山西行太僕寺少卿尋陞本寺卿丁內艱卒宣博學能爲古文詞時人重之

歐輝

歐輝長泰人正統末進士累遷廣東僉事廉介不阿抑強扶弱時有強寇依山剽掠者十餘年輝進兵勦捕境上以寧陞湖廣副使未任而卒

鄭和

鄭和龍溪人正統末進士歷官南京戶部郎中修實錄成陞雲南叅議爲政不矯不隨滇人安之以入賀卒和天性朴厚與人言若呐呐不出口其文章政事足爲後進儀範者最多

張寬

張寬平和人景泰辛未進士爲御史直言敢諫以劾總兵官石亨下獄後出知安定縣禦寇有功卒于官

盧元

盧元漳浦人景泰二年父卒貧不克葬乃鬻其男睿

以爲葬具錢主欲就携瘞去元乞襄事卽如約錢主
允之一日瘞出採薪於山忽得金三錠歸以營葬并
償錢主父子遂得完聚鄉人以爲孝感所致

郭舒

郭舒龍溪人景泰中進士授行人陞南京戶部員外
工部郎中擢知池州府舒爲人古直剛介持已廉行
事方嘗出使川廣累卻餽遺在池日以撫字爲先畱
意學校農桑而催科諸政若拙焉致仕去行李蕭然

吳森

吳森漳浦人天順丁丑進士累官浙江叅政定紹興

等郡徭役貧富適均江山草寇負險弄兵者幾三年
森至設法捕之民賴以安其他督糧清戎凡所設施
皆平恕寬仁之政

陳爵

陳爵字良貴南靖人天順初進士授潮之揭陽知縣
歲庚辰嶺南山海之寇並起賊酋魏崇羅輝劉寧各
據要害爵親詣賊舸諭之不從乃下令撤民廬舍而
以其材木圍匝於外然後築城濬池爲守備計未幾
海寇大至爵躬擐甲胄冒矢石爲士卒先賊度不可
犯遂遁去寇亂旣平乃撫凋瘵鋤豪強勸農桑興學

校邑民愛之如父母守臣上其績擢韶州知府以憂制轉高州未及一載卒揭陽之民請於郡守吳繹思立祠祀之有王廷烈者復給田五十畝以供祀事

林 同

林同龍溪人天順初進士歷官江西叅議調廣西禦賊有功陞浙江叅政督理糧儲民無所逞其奸仕終廣東布政使同外柔而內剛喜爲義事居官四十年祿入隨散卒之日家無飽貲

吳 原

吳原森從弟天順甲申進士拜兵科給事中嘗言事

譴彈劾益力陞都給事中累遷戶部左侍郎以僉
都御史視兩浙饑宣德意搜民隱勸分平糴且積且
賑蠲累年逋負數百萬民甚德之召還以疾卒遣官
諭祭并營葬焉

陳宏

陳宏龍溪人天順甲申進士授御史巡歷有聲因星
變上言歷數大臣之不職者數人出爲湖廣僉事治
豪民斷累歲不決疑獄計平洞庭草寇陞副使歸卒
宏長於政事而加以剛直故所至能其官孫遷官監
察御史

陳真晟

陳真晟字剩夫嘗以布衣詣闕上書及歸欲以明初志乃以布衣自號學者稱爲布衣先生其先泉州人初漳州苦倭寇乃設鎮海衛以保障之籍莆田泉州來爲戍守隸本衛後千戶所而生真晟真晟骨格高聳神氣肅清望之非塵埃中人也年十七八卽能自拔於俗以儒爲業薦於有司至福州聞防察過嚴無待士禮乃辭歸自是不復以科舉爲事務爲聖賢踐履之學初讀中庸做存養省察工夫覺無統緒繼讀大學始知爲學次第乃以大學爲據又讀大學或問

見朱子博採主敬諸說以補小學工夫始知敬者乃大學之基本也乃求其所以爲敬見程子以主一釋敬以無適釋一始於敬字見得親切乃實下工夫推尋此心之動靜而務主於一靜而主于一則靜有所養而客念不復作矣動而主於一則動有所持而外誘不能奪矣嘗語人曰大學誠意章爲鐵門關難過主一二字乃其金鑰匙也蓋意有善惡若發於善而一以守之所謂惡者自退而聽命矣又嘗語人曰人於此學若真知之則行在其中矣蓋以真知處善安循理樂所行甚順然而氣質有偏勝嗜慾有偏重一

者用事其順而易者反逆而難矣此聖門論學於博
學審問慎思明辨之後又加以篤行也天順三年用
伊川故事詣闕上程朱正學纂要其書首採程氏學
制次採朱氏論說補正學工夫次作二圖一著聖人
心與天同運次著學者心法天之運次乃言立明師
補正學輔皇儲隆教本數事以終上文圖說之意書
未上先上疏乞召見而陳其說不報及書上下禮部
看詳其事竟寢繼而家居讀提學憲臣頒行勅諭教
條有主敬窮理修己治人崇正學迪正道敦尚孝弟
忠信禮義廉恥等語喜曰此學校正教也然學校雖

崇正教而科舉不定正考雖有正教不行也因採勅
諭中要語叅以程氏學制呂氏鄉約朱氏貢舉私議
作正教正考會通定考德爲六等考文爲三等各有
條例可據而行聞臨川吳聘君名欲往質之乃貨其
家之直得五金攜其兄子一人以行戒之曰我死則
瘞於道題曰閩布衣陳某墓足矣行至江西張元禎
太史止真晟宿扣其學大加稱許曰禎敢僭謂自程
朱以來惟先生得其真彼吳許二子亦未如聘君者
不可見亦不必見也遂還鎮海初創戎壘莆人雖多
讀書家自真晟爲學而儒術始正人謂有功於鎮海

多矣自真晟與莆人李文舉諸前輩行文公家禮而風俗始正真晟生於鎮海遷於龍巖晚定居於漳之玉洲卒年六十四郡守彭垣立石官道旁以表之題曰大明闕下兩上書請補正學泉南布衣陳先生墓祀鄉賢祠有雜稿藏於家名布衣存稿

魏富

魏富字仲禮龍溪縣人成化丙戌進士授監察御史陞浙江按察司僉事進副使重舞文告訐之禁有豪猾誣縣令同列知其情莫敢辨而移於富富爲直之浙東岸江田爲水所囓富命築石隄凡捍田若干頃

歲饑賑貧民所活甚多弘治初陞江西按察使五年陞都察院右僉都御史整飭薊州等處邊備兼巡撫順天等府以病告歸十一年至京改南京大理寺左少卿尋陞大理卿正德初陞刑部右侍郎遂致仕正德八年六月卒祭葬如例

沈源

沈源龍溪人纂修英廟實錄以清節著爲南京巡視御史江洋號令嚴肅盜賊不敢犯因天變上言刈修德弭災十事後以諸貴臣交章誣之貶知盧氏縣以疾卒

許潛

許潛詔安人領成化戊子鄉薦知平樂縣不以家累自隨盡心職務招撫洞徭剖決疑獄尤加意學校親爲講解後卒于官百姓悲號不已

吳環

吳環平和人登成化己丑進士歷南京庫部主事郎中擢貴州叅議有平夷功遷雲南叅政奉命釐正鹽法宿弊一清陞右布政使執法不撓時黎酋弑其叔而奪之位獄久不決環寘諸法重賄不能入也以
外艱歸卒于家宦橐蕭然

吳玘

吳玘龍溪人弘治間進士授撫州府推官有折獄才
每公出裹糧自隨不勞百姓以外干名譽十年不得
調後爲御史直言敢諫有古諍臣風巡按山東以疾
卒人咸惜之

林魁

林魁龍溪人弘治中舉進士授戶部主事陞員外郎
郎中度支有法不畏疆禦出知鎮江府當兵荒之後
寬猛得宜民賴生息擢山西提學副使公嚴有聲調
雲南兵備撫鐵索青夷諸酋有功陞廣東叅政致仕

所著有白石野稿歸田錄行于世

洪異

洪異龍溪人領弘治乙卯鄉薦知崇德縣擒江淮劇盜墾田至萬餘畝擢御史執法敢言陞四川僉事改浙江過惡揚善恩威並著遷廣東叅議鎮靜自持不嚴而治歸卒于家孫公諧舉進士第

劉友仁

劉友仁字是成號涵江漳浦人正德甲戌進士授南京戶部主事轉禮部主客司郎中遷知黃州府以母喪去職起復爲衡州以才調廣州遷湖廣布政司左

叅政丁外艱起復爲浙江左叅政撫民南陽其爲戶部嘗監淮安權稅及持節往使湖廣理賦役發其滯逋以實京庾權稅故毛細易汙爲之者往往矯厲苛核繳其迹以冀自免督賦所臨遇皆藩郡大吏至者輒弛懈不欲急懼見爲觸仁在淮安尤簡易與商爲便督賦故嚴密鉤剔滲匿不以藩郡尊鉅爲忌二事以集竟免汙跡亦卒未嘗有所觸黃州江漢經流之衝民賦政煩前守日夜治文書交賓客寢食不得休衡州在山谷深奧處田野饒足郡中嘗暇因習爲偷仁兩易其俗事成集湖廣浙江叅政主督版冊財計

細及米鹽仁獨踈目濶節然絕無漏失撫流逋多以寬招至安集而稽察誅賞用之不少貸唐鄧之間益用和懷其所治各有以自得如此

楊表

楊表龍溪人正德甲戌進士授南戶部主事陞郎中督稅兩廣勞業大著擢知長沙府清慎自持改知雷州興學校表節義濬水利作文以祭城隍猛象爲之出境郡人異之陞浙江鹽運使削去常例浙人謂三十年來清官楊表一人而已陞廣西叅政致仕以廉介終其身

林梅

林梅龍溪人嘉靖己丑進士歷戶部主事郎中督課
江州覺察內帑僨運糧儲所至持正不撓坐是忤權
貴出知泰安州同知慶遠南安府陞南京禮部郎中
卒于官梅慷慨有氣節志在天下國家爲文章博雅
有則人推重之

林士章

林士章字德斐號璧東漳浦人母蔡姪時所居寢室
有赤光時見之兒時沉默聰穎志意不群稍長博聞
強記爲文有大雅風嘉靖戊午舉於鄉明年己未升

于秩宗廷對賜一甲第三人及第授翰林院編修當
世廟末年詞臣待詔金馬多以供奉承恩章獨閉戶
下帷沉潛經籍修飾矩度謝絕汎交壬戌丁內艱歸
丙寅除補故官先以宗人偕計避不入闈至戊辰會
試乃爲分考得儁爲多出則擢國子監司業大司成
豫章王章座主同爲國師士侈談之王務持大體而
章佐以嚴密考課繩糾無所假貸諸生心服己巳丁
外艱歸壬申服除以久次起南京國子監祭酒癸酉
改北念大學諸生卒業而歸格於里選疏令從其省
試欲詣京兆所司檄遣甲戌陞禮部右侍郎兼翰林

院侍讀學士兩銜並拜時謂特恩其後率以爲常丁
丑改左兼官如前時 上御經筵章補講官重修會
典爲副總裁章雅志獻納旣列經幃思以啓沃自效
早夜訂正講義先期肄習齋宿祇畏如在御前入館
考證古今損益時宜史臣多受成諳練朝典明習星
曆堪輿諸書在部六年朝堂陵廟日有修舉謀畫居
間諸司之政較如指掌有所主議吏人祇服會相國
居憂廷中連名疏保關西馬爲大宗伯章及太倉王
爲佐相顧慨然以爲典禮之司倫紀所係當爲名教
守之遂不列名相聞嫌之忍未有以發也已馬入閣

王以告去而章所與同事多不相謀時以職事謁相
相遇章落落無所唯阿而與它僚甚昵識者以是重
章而言者矚其形似乃裾撫里人細事傳入白簡賴
上聖明不遽爲動而太學諸生至羣詬言者之門謂
林先生品第何等而銜骨及之不有天道耶時章去
國學已數年其風聲所激士猶如此迨歸陞南京禮
部尚書再疏致仕年七十七卒卒之前期地震三夕

胡春同

胡春同宗華季子幼失怙恃事二兄克盡愛敬由鄉
貢歷任義烏柳州吉安教授日坐明倫堂教導弗怠

雖祁寒盛暑衣冠肅如也生徒餽遺輒却不受性溫厚清苦篤學好修至老不倦卒于官無以爲殮吉人李昌祺哭之哀曰善人云亡士類嗟惜諸生爲服其喪

李誠之

李誠之龍溪人事親克孝踐履篤實隱居城市開義學以淑鄉子弟不義之財弗視橫逆之怒弗加防弊隙杜害源有古君子風劉宗道嘗曰吾漳有誠之猶夜中之孤燈涇中之脉渭也

福寧州

周斌

周斌字質夫寧德人洪武中領鄉薦授建寧府學教授時兵革甫息斌修廢起弊嚴立教條作興士習郡縣長貳非公事弗造其室與之語皆政教大端弗及私事十五年雲南平譟賀表稱 旨有金幣之賜秩滿召至便殿承顧問以質直見重明年拜中都國子監司業約度明信諸生悅服又明年召還陞齊王府左長史輔翌開陳一以正道丁內艱以病卒

林拱

林拱字仲恭號雪樵福寧人篤信力行爲文以理勝志崇恬退惟教授鄉黨以淑後進洪武中屢以明經薦不起晚年強召爲本邑訓導數月以疾辭去處困履窮泰如也同縣鄭轡文行與拱相敵皆八十終

陳琦

陳琦字公琰福安人永樂中進士累官江西按察司僉事政通而敏法平而恕嘗行部至筠筠方大旱民以爲憂琦引咎自責齋沐致禱甘雨隨注一日坐堂上庭有大蛇長數尺翹首向琦若有所訴琦異之令人蹤跡其去得古井中有遺屍密訪乃知有其妻與

人私者并殺其夫投之於棄井中捕至遂服罪錡人以爲神琦數歷所至善政尤多此其最著者也未幾卒於京師寓舍

陳 錡

陳錡字器之福安人領鄉薦拜監察御史永樂間監軍甘肅號令嚴明軍民戴之忽虜寇將至或曰寇勢猖獗宜少避其鋒錡奮然勒其兵拒戰數日力不能支被執錡厲聲罵賊不屈虜怒殺之事聞 太宗爲之涕泣曰陳御史忠臣也

孫 賦

孫賦字國用福安人正統間由太學生授龍川縣知縣地僻民稀素號難治賦爲政明敏輕徭薄歛重農勸學寬嚴得宜數載之間增墾田米三百餘石奏蠲屯田陪徵米五百餘石十四年黃蕭養倡亂得禦城邑招集流亡上下愛之秩滿固請致仕歸卒年八十七

林聰

林聰字季聰福寧州寧德縣人正統戊午鄉舉己未進士擢刑科給事中卽毅然以古直臣自矢曰所不盡心以報國者非夫也車駕北狩内外多事侃侃在

職知無不言劾光祿卿奈亨太監王振家僮張伯通
奸狀又劾總兵官楊洪孫鏜不協狀景泰元年轉都
給事中會太監金英家人會慶殺人臺憲有欲爲英
地者卽併論之內侍覃增恃寵驕縱勢焰日益甚且
聞大臣中有候其生日結約武弁持賄拜賀其門如
往年之事王振者聽偕科道盡暴其罪惡乞急治之
章旣成對衆復增二語曰復起羣邪趨附之風大開
小人奔競之路益厚嫉大臣之儉小者也旣奏上
卽命錦衣衛捕治駙馬石璟 景帝所親信者有罪
劾之不避辛未八月 英廟北還廷議迎鸞或謂虜

人變詐不測遣一車二馬往迎足矣聰曰上皇北
征爲宗社計也迎復禮宜從厚壬申奸人建議易儲
聰欲極論而言先泄衆爲聰危聰泰然自若事雖未
濟天下多之癸酉虜酋也先遣使來貢自稱可汗聰
以也先弑逆縱中國不治夷狄而稱其稱謂哉

詔從其議而却也先之貢一時聲望赫然忌之者如
讐上欲保全之乃遷春坊司直大學士商輅薦其
材可大用授吏科都給事中奸人思中以法屬鄉人
教官乞便地以養親聰於銓曹白之王文以議迎復
事啣其異已嗾御史王溥劾聰甥爲教官因聰言得

晉地下獄會官廷議文致其罪以太臣專擅選法論
當死廷臣當連名署奏牘禮部尙書胡濙謂文曰給
事七品官也而擬以大臣囑託公事也而擬以選法
二者於律合乎且人臣以宿憾而欲殺諫官無乃不
可乎遂拂衣而出曰此疏吾不預公等自爲之濙歸
遂卧病不朝數日 上遣中使問何疾曰老臣無疾
前日議事欲殺林聰殊驚悸至今不安爾中使具入
告旣而法司復以比擬上 詔曰比擬殺人可乎聰
得不死左遷國子學正丁丑 英宗復辟起右僉都
御史山東饑命賑貸聰詢拔能官散詣村落給食及

醫藥全活數十萬天順二年還陞右副都御史江淮
鹽徒橫行命聰往捕以便宜擒其渠魁梟數人餘脇
從則用輕典盜以寧息尋歸院已卯秋遭內艱去庚
辰 詔起之固辭不遂七月曹欽叛於京隨就擒幸
功者妄取首級至使都人不敢夜出聰時署院事按
之必生獲始論幸功者乃息餘辯明悉無冤濫成化
丙戌江淮旱人相食承命綏撫聰奏借江南糧及支
運糧儲數十萬以給民且與之種活民甚多丁亥九
載滿秩陞右都御史辛卯又有宣大之行至則邊庭
寧肅尋詔還聰性剛簡不附權貴間有短之者壬辰

卽移病回籍去越二載 詔復南京掌院事十三年
刑部尙書缺僉舉補之十四年加太子太保獻獄甚
明清聲益振己亥被旨偕定西侯蔣琬按事遼東疏
言失機者令以功贖詔從之屢乞身体致弗允壬寅
竟卒於官年六十有六贈少保謚莊敏聰立朝侃侃
風節天下想慕而且和氣如春厚重如山見者敬愛
無已所著有見菴集若干卷奏議若干卷詹事陸簡
云聰自抗易儲之議著直名海內士皆想望風采而
郡縣聞公所至皆惶汗喪魄救過不暇一時大臣風
裁屹屹足鎮浮薄而繫人望如聰者益鮮其比至於

再起則更爲溫厚謙抑與物無忤議者謂其方圓互
用衡鑑常平求之古人中亦不多見也

人物考卷之七十六目錄

湖廣武昌府

魏觀

周琮

黃琛

蔡哲

陳宜

范俊

周縉

王允茂

鄧槐

程立中

王愷

鄧真

陳智

辛浩

王庾

黎忠

劉諒

李田

汪洪

向珍

王儼

吳原正

徐鏞

黃玆

艾傑

吳偉

李承芳

李承箕

朱伯驥

吳廷舉

劉績

王禴

李承勛

江師古

廖漢

張璞

劉珂

鍾湘

戴書

王良

仵瑜

王疇

趙邦柱

汪文盛

胡堯元

廖道南

馮世雍

朱廷立

謝存儒

龔良傳

汪宗元

胡濂

熊桴

魏裳

劉師穎

補遺

孟廷柯

方震

汪宗伊

吳國倫

孟養浩

郭正域

漢陽府

張敏

戴金

陳昂

陳傑

蕭良有

附弟良譽

本朝分省人物考卷之七十六

南直督學御史西浙過庭訓纂集

門人蘇松備兵副使南郡熊膏叅閱

男過銘盤

過銘孟

過銘簞

懷遠訓導武陵胡應魁

寧國府學生員嚴弘志

句容縣學生員劉孔陽全訂正

湖廣

武昌府
漢陽府

魏觀

魏觀字杞山蒲圻人幼讀書蒲首山中勤苦弗輟性
喜吟咏觸物感興陶寫自如乃構亭曰梅初以寄志
焉元呂忠肅薦於朝辭勿就 國初被徵與青田劉
基金華宋濂諸儒同謁 上與語大奇之授平江州
學正遷國子助教浙江提刑僉事吳元年改兩淮都
轉運使入爲起居注洪武初建大本堂 命觀侍

太子說書及授秦晉諸王經觀以詩記之二年甲戌
降甘露於乾清宮林 上問災祥觀曰帝王恩及於
物順於人則甘露降 陛下誕寬民賦衆庶懽豫底

於清寧神應之臻職此故也十一月冬暖如春 上
召偕危素詹同吳琳宋濂遊觀內苑錫燕紫閣御製
序文賜之三年正月轉太常卿改定太廟祝文稱孝
子皇帝臣凡遣 太子行禮稱長子某著爲令是月
陟侍講學士十二月辛酉編集大明志成以觀爲嘉
議大夫國子祭酒宋濂爲司業四年廷試進士觀與
博士孫吾與修撰王俱爲讀卷官乃得吳伯宗等一
百二十人時開科之始得人最盛而伯宗卒爲名臣
人以此多觀之識九月坐考祀孔子禮不以時奏謫
知龍南縣濂知安遠縣行未至任卽召還以爲禮部

主事五年 上念姑蘇爲京輔重地經張士誠之亂
荼毒罔有寧宇廷臣咸薦觀有治才乃出知蘇州府
旣蒞事懲陳寧苛政鋤暴樹良敬老恤民大建學舍
闢宣聖庭舉鄉飲酒禮聘羣賢闡文學禮耆耄時戎
事倥偬百物彫耗禮文衰落乃能力挽躬行風教勃
興封部皞然課績爲天下最 上嘉之陟爲四川行
省叅知政事蘇父老上疏願留仍命觀還郡七年觀
以舊治制爲士誠竊據且郡多水患乃修府浚錦帆
涇以壯士觀以資民利御史張度誣其興旣滅之基
遂與高啓俱獲罪 上悔之命所在致祭 皇太子

諸王哀賻有加乃歸瘞於蒲圻燈窗山

周琮

周琮字仲方崇陽人幼警敏稍長遊學邑庠篤志進修遂進大學居上舍洪武癸酉擢試刑部郎中戊寅遷浙江布政司左叅政以母憂去永樂初調河南未幾調陝西巳丑冬奉命偕戶部侍郎左獻總軍餉於邊事竣還遇寇與敵死之時年四十八爲人端重諒直當官處事以義爲制不以利害動其中故所至有爲自諸生起贊邦憲推獻詳慎多所平反人以爲難及爲叅政三任皆名藩而陝西尤爲重地爲治七

年所部吏民咸便之及以軍興出督餉事決策前進
不憚艱險期以大丈夫功業自効而不幸以死子軌
亦清慎有父風自太學生擢令歸安用薦徵入爲御
史

黃琛

黃琛舊名寶武昌人歲壬寅以帳前叅隨舍人擢兵
馬副指揮上愛其謹厚命尚皇兄蒙城王女甲辰
爲聚寶門店官乙巳授管軍千戶尋改龍江衛守禦
千戶累從王師征討及鎮守畿甸多著勞績洪武元
年封皇侄女爲慶陽公主授寶駙馬都尉旣而兼明

州衛指揮使改淮安衛指揮使三年改名琛禮部奏稽古公主之制皇姪女宜改封郡主琛當上駙馬都尉誥命上念皇姪女惟一人不忍遽加降奪命仍稱公主歲給祿米五百石琛亦稱駙馬止食本官之俸十四年擢中都正留守授驃騎將軍卒年四十九歲

蔡哲

蔡哲字思賢武昌人仕陳友諒爲監察御史歲壬寅來歸授江西行省理問陞右司郎中命往贛州招諭熊天瑞遂遣子入朝擢哲中書省叅政命往蜀報僞夏明昇聘哲因挾畫史同往圖其山川險要因言昇

可伐卒用其策改四川僉事尋進福建叅政未幾復召還爲御史以所舉御史犯法被劾免官卒 上深惜之

陳宜

陳宜字仲誼嘉魚人洪武中授桂林衛經歷贊畫戎政召爲兵科給事中改工部主事轉員外郎永樂時營建兩京勞績居多洪熙初擢廣西叅議中允王愷撰文稱其德懋厥官凡三十年老而不倦

范俊

范俊大冶人洪武間以貢拜監察御史歷陞左僉都

御史立朝以風裁見稱與同時李興邦艾良並名權貴避之

周 縉

周縉字伯紳武昌人洪武中以貢入太學初授永清典史居官廉謹攝令事捕蝗弭盜俄而靖難兵起一時守令多相率迎降永清地尤近燕縉極力爲拒守計顧其民寡弱爭先逃散縉度不可爲懷印南奔將他圖焉道聞母喪還家以禮葬畢卽出糾義旅勤王戰艦戎器略具已聞南師敗而天命去矣縉乃走匿民間久之蹤跡漸露有司卽其家捕獲械送京師縉

自分必死慷慨就行至則朝廷特下之獄謫戍興州居數年子代還屏跡田園年八十卒吳文定寬爲縉傳有曰以愧世之爲丁公而倖免者是時吏部言前北平屬州縣官朱寧等二百九十人當皇上靖難時俱棄職遜避宜寘法典詔俱建茂

王允茂

王允茂字才英其先自瀏陽徙居蒲圻學古通經操節高尚與劉三吾陳南賓友善咸負顯名洪武十八年舉明經授泰寧令聲華弊政民情翕然太祖高皇帝錫之丹符以旌厥績卒于官所著有楚林集

鄧槐

鄧槐字大材蒲圻人洪武庚辰進士性資端慎以禮
自守授成都新繁知縣創規制設條教修水利墾荒
田民多賴之再任新津政聲益著蜀志謂新繁有清
白江槐嘗以此自勵人謂其操行之潔能無愧云

程立中

程立中字執夫嘉魚人家貧力學嘗役於官爲尹所
辱立庭下朗吟一詩尹曰才子也會有詔求遺逸遂
薦之授縣丞以催科後期繫獄一夕成詩百首太
祖原其忠愛釋之俾復官九載致仕卒

王愷

王愷字時舉蒲圻人兒時卽抱鉅人志肆力於學永樂甲申進士知江寧剽煩剖劇處之裕如命撫畿甸逋氓旋集上問戶部錢穀出納面對不爽預修永樂大典進左中允時漢庶人構陷宮僚下獄愷誦讀不輟宣德初補廣西僉事時徭徭爲亂遣文武將臣同愷往撫土酋底平又捧檄綏勞貴州土夷上賜遊後苑觀元宵燈愷疏陳六事特賜俞允征大藤峽襄翊有功至潯州建學宮炎徼向化轉廣東左叅議往撫欽廉叛寇事平刻石招遠山

鄧真

鄧真字存誠江夏人永樂辛卯進士授監察御史上
疏言時務十事上悉從之擢山東按察司轉布政
使真讞獄詳明政事通敏歷藩臬愛民如子卒于官
吏民見其行止如生以爲神繪像祀之

陳智

陳智字孟機咸寧人永樂間進士授監察御史按福
建有張生者以誣殺妻論死察其寃出之戊戌按南
畿捕奸黨數十置于法擢陝西按察使剪猾理滯圖
圖爲空洪熙初入覲兵部令朝覲官給養馬歲課其

駒智上疏以太僕臨監司歲徵駒如紀綱何 上善
其言關中饑岷中有造寺之役疏止之進江西又布
政使適永豐曾子良亂智戮其首惡餘皆宥免正統
初進都御史諸道多滯囚智多平反上疏言邊務風
紀三事皆允行智性剛猛御史張昂因致駁智答
之四十勗遂與他誣落職

辛 浩

辛浩字養正江夏人正統戊戌進士任監察御史彈
劾不避權勢謫戍遼陽俗不尚文學浩至選將校子
弟教之皆有成卒爲名士天順中復其官

王庾

王庾字仲京江夏人正統中進士任戶科給事中因邊患以練達治體暫改御史勅巡山西練兵守備事平陞左給事中景泰中以才能薦復勅鎮河南平生無過舉歷官廣東右布政使

黎忠

黎忠字行恕武昌人正統中監生授建昌府推官閩寇鄧茂七攻陷隣境忠選驍勇屢出奇謀克摧賊鋒擢福建知府

劉諒

劉諒字守貞興國人景泰間以國子生授鹽城令竈戶非重犯例不服有司勾攝諒至別竈戶之籍名于官者餘悉入編戶法乃得行城啓閉由守禦所有司出入不自由諒乃白于當道奪城禁鎖鑰掌於縣慨科目乏人延禮碩彥訓誨庠士暇則出郊農親授耘刈之法植蝗禱於城隍蝗皆入海菰死每旱禱輒雨雨不出境有一村雨不及使人廉其故則得妻殺夫冤狀人尤異之偶宿民舍夢有赴愬者明日猫投竈死命掘之下一古墓爲徙葬是夜又夢赴愬者來謝淮賊喬亮當道捕不獲喬賈鹽城責諒捕喬聞曰毋

累賢父母自投聽解出鹽城境仍亡入海終諒之任
不爲患九載考績民不忍其去復留三年致仕

李 田

李田字舜耕嘉魚人承勛父景泰甲戌進士歷戶部
郎中成化初督餉征蜀有功擢廣東左叅議海南夷
叛躬抵巢穴懇切開諭夷皆効順進左叅政閔歲辦
綵幣除墨印之弊累遷副都御史巡撫京畿歲饑發
廩賑之嘗建議增漕以足邊餉嚴令以警邊烽給財
以市戰馬設法以充隊伍專任以責成功立禁以息
囂訟皆允行之中官汪直用事怒田不私謁遂嗾之

歸或休以禍處之怡然不改其度

汪洪

汪洪字克容蒲圻人成化初順天鄉試第一明年登進士歷戶部郎中值北虜入寇威寧伯王鉞統兵出征洪督餉斟酌損益區畫攸當陟山東叅議以拒冢宰尹旻子請託譖之中官汪直謫知綿州歲旱捐俸賑救旣乃濬水源創石盤七堰溉田數千頃民賴之先是都御史孝感張瓚開壩底諸堡以通茂州命洪往理戎務土酋突遇洪控弦交射中流矢墜偏橋懸崖死居人月夜每見乘馬如生立祠祀之

向珍

向珍字子席大冶人由太學生授廣西興業縣知縣縣有木頭崗寇猖獗珍集民拒守成化乙酉韓襄毅公雍爲總督都御史賊扼其要路使不通珍竟潛往見之韓奇其來委以便宜遂破賊以火攻搗其穴擒斬甚衆韓上其功尋陞鬱林知州興爲鬱林屬邑益得人心禦賊拊循其民未幾卒民感其德家戶祝之邑城北有向公井者則其備賊時所禱泉也

王儼

王儼字民望其先蒲圻人曾祖子民爲元新喻令謫

華容遂家焉成化己丑進士授兵部職方司主事改工部都水治呂梁洪事竣轉刑部郎中往按鄭府盟津王獄多所平反補成都知府值妖僧無邊等以術惑衆縛其僧戮之擢河南左叅政復按涇陽王獄具得其實轉陝西右布政使北虜寇西固城總制王越屬儼督餉區畫芻糧摘發奸宄大宏政績中官劉瑯索金齎玉儼峻拒之尋陟副都御史巡撫山東上言弭盜五事召入爲戶部右侍郎釐革風弊總理漕政人多稱之未幾致仕年八十有八子官之領鄉薦

吳原正

吳原正成化辛卯舉人任博白知縣博白地近雲盧大桂賊巢民多徙業衆危之原正至設堡伍修武備墾田疇民賴以安陞思明府同知思明視博白尤爲邊境原正益盡心民事以疾卒于官囊橐蕭然民有設奠道路者

徐鏞

徐鏞字用和興國州人成化己丑進士授行人陞監察御史巡通州倉念漕卒困於掊尅酌定收納常則奏行之遂著爲令時濬大通河上疏論其不便已而果然巡按福建會鄉試有恃勢以私干場屋者不容

入試代還以災異陳四事又以星變請免慶成宴調陝西鎮遠縣知縣值歲饑請於上官移民就食全活甚衆禱旱罪已請罰俄以修倉得窖錢數十萬緡籍之以賑貧乏蠲宿逋流亡多復業者尋調臨潼鎮原民千百泣送之弘治元年陞淮安府知府卓有善政轉廣西右叅政河南右布政使擢右副都御史總理漕運兼巡撫鳳陽等處鏞在淮安時周知綱運之弊於是以法繩下劾不職察邪慝軍民稍息弘治十二年八月卒年五十六賜祭葬如例

黃 玠

黃玪字敬潤蒲圻人成化乙未進士授江西南安知縣爲政嚴峻豪宗屏迹拜監察御史堅持風紀不畏強禦時貴州征都勻苗勅玪紀功改土爲流改州爲衛厥功居多陟大理寺寺丞

艾傑

艾傑字世英崇陽人少爲諸生知府秦夔以絕田百畝濟其貧傑不受成化丁酉鄉試授四川江安教諭每晨衣冠坐講不懈不問束修諸生不能婚者助之力變文體聘修蜀志擢成都府學教授舉行冠婚禮著崇陽志

吳偉

吳偉字次翁江夏人少孤貧善圖繪不師而能山水人物入神品性慇直有氣岸與俗寡諧求者非其人不應雖素與之昵好一言不合輒投硯而去成化間成國公延至幕下一見以小仙呼之因以爲號憲皇帝召至闕下授錦衣衛鎮撫待詔仁智殿偉有大醉被召蓬首垢面曳破皂履踉蹌行中官扶掖以見上大笑命作松風圖偉詭翻墨汁信手塗抹風雲慘慘生屏障間左右動色上歎曰真仙人筆也偉出入掖庭奴視中貴人求畫又多不與於是中貴

人數短之放歸南都 孝廟登極復召見便殿命畫
稱旨授錦衣衛百戶賜狀元印章寵賚日厚偉思還
楚蒙恩祭掃武昌數月還次采石有旨趣回京賜第
逾二年稱疾居秦淮之東涯 武宗卽位遣使召之
未就道中酒卒時年五十葬於金陵

李承芳

李承芳字茂卿嘉魚人幼穎敏生七月以筮書灰作
土地二字年十四伯父中丞田指鄉富貴者示之曰
兒志及此乎對曰富貴不淫貧賤樂兒志也成化庚
戌舉進士授大理寺評事無鮮裘良馬嘗謂主事楊

循吉日予得俸三十緡可津而南矣及陞寺副遂謝
病歸與其弟承箕隱黃公山講學賦詩論治以教化
爲本雖蔬食屢空不悔也

李承箕

李承箕字世卿嘉魚人幼有大志不喜爲舉子業好
爲古詩文入大崖山讀書非禮不動赴成化庚子鄉
試考官桑悅首選其卷監臨者不從悅上書政府論
薦丙午領鄉舉丁未一試禮闈而歸聞嶺南陳獻章
講學徒步往師之不復仕進乃築釣臺于黃公山與
兄承芳日夕奉母怡愉一堂雖貧約不計及母喪寢

苦枕塊不離喪次爲人寡言笑終日端坐人莫窺其所存爲詩文下筆立就若不經意工草書人爭傳之所著有大崖集

朱伯驥

朱伯驥通山人成化癸卯舉人築室溪南專精墳典與俗違尚浚任廣州推官從白沙陳獻章游浩然有歸志退而上書論古今人才不相及白沙以爲知言遂棄官歸橫經講學時放歌自適

吳廷舉

吳廷舉字獻臣嘉魚人成化癸卯年十九舉於鄉丁

未舉進士授廣東順德知縣繁已字民減賦息訟刻
家禮以道民邑有宿盜久莫治至則立執之都御史
屠瀟檄至督府與之言甚溫答曰廷舉越境奔命宜
有地方重大事請發令屠曰順德大璫屬以修葺家
廟可爲料理之荅曰守土官非奉舊例新恩一夫不
敢役遂辭出屠令他邑成之市舶太監給銀買葛卽
以銀市二葛曰奉此爲式如不中請還金且葛雷產
也太監怒取金去御史汪宗器惡廷舉乃曰彼專抗
上官市已能何也會廷舉壞淫祠觀寺以其材作土
堤書院賢館及修學宮御史按而會其竹木碎屑俱

列斤兩鄉大夫二子犯盜並論死廷舉生其少子標其戶曰盜後少子改行乃泣愬曰公念先人廉直故存後今盜其門大爲先人辱請就死乃爲撤之御史捕盜令自首賂知縣毀門表盜曰盜死分也不敢誣廉令加以嚴刑不易口是時廷舉囚服梏手日詣訟所分析無私盜狀御史大慚命釋之弘治丙辰屠入爲吏部尚書遷廷舉成都同知一年以憂回起復改松江上疏請軍政二事廣東盜起馬端肅劉忠宣薦陞兵備僉事征十三村諸洞盜平之改兼鹽法正德己巳逆瑾方用事令各省庫藏悉輸京額外索取以

爲當出於鹽廷舉力拒之疏請乞留備兩廣兵興之費瑋啣甚及鎮守恣橫廷舉劾大監潘忠二十罪具奏有旨取省帑解京皆非正費曰貢進內也曰司禮打點錢賂劉瑾也又疏便宜事忠亦誣列廷舉罪鞠之無狀止以枉道回荷校吏部前再請赦爲民五年瑾誅直其誣晉雲南副使未行陞江西叅政討姚源賊用兵已歷年總制臣數易官第顧其私兵不協力費以萬計廷舉雅多智略勇不避難及逢盤錯益多裁決前已數用勝兵茲則設奇取捷不用甲冑出入輕脫諭責解散反爲賊得奉之入巢周圍耀威劫廷

舉求撫廷舉如前責諭詞色亡撓久之伺得賊中要
領誘勁賊令執其酋長廷舉出復入一鼓平之疏立
萬年縣民懷至今晉廣東右布政使立番船進貢交
易之法定均平驛遞之役弊更患除嶺西猺獞作亂
命兼兵備副使經略十二年湖南饑命以副都御
史賑濟勅勘永順保靖兩江口夷情堅相約束條奏
武廟還京命往湖廣定諸夷地界又遷太事陰備寧
濠之變當道不用濠嘗遣使遺天曹陸完金簡曰宜
急易孫燧代之者某俱可吳廷舉切勿令其來濠敗
邏者獲之十六年召爲工部右侍郎尋改兵部右侍

郎上疏犯輔臣改南工部嘉靖二年又改南京戶部
本年遷右都御史理南畿折豪強植貧弱禁私驛止
妄供舉長身而瘠面如削爪敝衣帶穿不修藻飾神
采英毅志節雄偉言行必自信人鮮能奪之視財利
如糞土妻子冒饑寒而施予不輟滿三年進南京工
部尚書四年疏歸里居二年而卒無衣以殮無棺以
殯都御史姚謨爲營辦經紀其喪性好讀書無不窺
索積書至數萬卷好薛文清及胡敬齋錄采其要言
作詩倣陳白沙覽者知其志簡情真至規人所不及
直中肯綮毫無諛詞奏草剴當可以爲式卒時年六

十六

劉績

劉績字用熙江夏人幼聰敏不羈貫穿羣籍尤精於
考覈凡所撰述古雅冲淡根極理要負一時物望弘
治庚戌進士歷吏部員外補鎮江知府所著有禮記
正訓蘆泉詩文集

王禴

王禴由舉人成化末授河間督馬通判虜寇犯邊司
馬余子俊總督軍務命畿輔各推廉能官督運糧餉
至大同闔府推禴往踰月事竣秩滿將報政郡縣父

老相率詣撫按乞留禴懇辭歸杜門不出族黨有貧者散所有以周之故舊之家必杖履親造年八十卒逆瑾用事仍致其罪罰米五百石家益窘子孫有披褐負薪者矣

李承勛

李承勛字立卿嘉魚縣人自幼英邁家食時以經濟自負比弘治癸丑登進士授太湖知縣在官民頑至則招集父老示以禮義強梗者治之不少假借以其餘力修舉學校考德問業親督勸之又砥身廉介省費薄徭流亡悉集民多碑識然勁氣孤峭人多忌之

久之補南京刑部主事歷員外郎中明習法律多所
平反有奸法當坐者雖勢豪不撓每日散衙無事與
胡公世寧魏公校余公祐以道義相切劘尤究極典
故并中外條例興革邊圉強弱事幾得失一一籌算
以自考鏡時稱爲四君子會以憂去服闋仍補南京
工部郎中未幾陞南昌府知府南昌難治劇賊驕藩
內外孔棘勛深略雄才迎機輒應正德六年贛賊犯
新淦執叅政趙士賢靖安賊據越王嶺瑯琊岸華林
賊破瑞州勛廣伺諜繕壁壘扼溪澗進戰擒胡雪二
酋還府華林賊又叛殺副使周憲乃諭降賊王奇約

內應夜引兵舉火爲號大破賊斬首三千境內安輯
八年姚源賊起江浙間執兵備吳廷舉總制俞諫請
邊兵勦賊勛曰賊乏食必掠裴源就積粟請贛兵自
德興南昌兵自岳源分兩翼伏裴源而令邊兵驅賊
賊果走裴源大敗遯去太監黎安欲奪其功誣勛竄
賊嗣大理卿燕忠卽訊廣信事白九年陞浙江按察
司事持大體微瑣不校凡貪墨吏雖親故不屈庇或
本廉吏而爲毀者所中傷則力爲伸雪之憲紀肅然
人不敢犯丙子進陝西右布政使敦本務實率以儉
約嘗掌藩事力專才贍一時弊政釐革殆盡下和買

之令禁無名之役人至於今稱之十四年轉河南左
布政使十五年陞右副都御史巡撫遼東遼東故富
饒無虜患自汪直開邊虜輒携二擾我開原懿路泚
河三城俱遭殘破乃修築定遠慶雲等處六堡修理
墩望百八十一所屯田千五百頃鐵嶺蒲河撫順諸
城皆濬湟樹木爲阻固東圍稍寧進俸一級嘉靖二
年養病四年起南臺五年轉南京刑部侍郎進尚書
六年召入吏部會新進用事從中沮尼進改刑部加
太子太保上疏論時事本年十二月改兵部尚書兼
都御史代故端敏公提督團營加太子太保惡郭勲

騎縱剪其羽翼疏入辭營務不允八年改尚書兵部
當是時田州岑猛叛用兵兩廣騷動芒部沙保又叛
上魯番奪我哈密搖河西小王子歲入塞勛與端敏
相繼本兵同心經理戎事以戢又奏裁各省鎮守守
備內臣二十七人錦衣官校旗勇內府詭匠數千人
嘉靖九年大風晝晦上恐懼詔問勛答曰聖祖
有訓謹避胡戎去歲冰合北虜盡入河套以故陝西
邊患延寧固原爲急甘肅軍餉專仰河東宜令蘭州
及時糴貯以備河西災窘曩時河西患苦土魯番今
亦卜刺又深入兩寇騷擾孤危益甚海賊套賊出入

使相隔絕兀良哈最近京師撫之不善卽爲門庭之
寇雲南安鳳之叛軍民困敝臨安蒙自盜賊復起曠
日持久恐釀成大患交趾世子流寓老撾異日歸命
請授或據地求封皆未可測惟用人理財早爲警備
以保社稷後庚戌之變人皆思其言之奇中又騰驤
四衛者詭冒依附奸欺不可詰上言宮府一體請官
軍考選清覈並如旗手等衛制曰可太監麥福言四
衛禁軍隸兵部不便往歲彰義門破虜東市勦曹賊
皆四衛功以直內故得號召易集下兵部再議勛執

言往歲之事正以兵權歸闕致亂彰義門之戰由太監王振東市之賊卽太監曹吉祥麥福語塞竟從其議十年致仕卒贈少保謚康惠

江師古

江師古字克末蒲圻人弘治癸丑進士授工部主事清江浦管閘時中貴往來作威凌轢師古不爲屈正德初逆瑾柄國卽投疏歸性儉朴敝衣垢襪陋室匡牀儻然肆意而已

廖漢

廖漢字天章蒲圻人性剛毅獨立不回弘治六年進

士授戶部主事陳情便養改南京孤介有聲正德初
起復值逆瑾柄國乃上疏抗論時政不報再疏自陳
歸結廬五洪山潛修以居

張璞

張璞字中美江夏人弘治乙丑進士授監察御史按
雲南時鎮守中官役軍虐民璞重法懲之忤逆瑾逮
繫下獄卒贈少卿

劉珂

劉珂字公佩興國人弘治丙辰進士令長洲興學校
禁博徒除盜賊墾民田三千餘畝興水利七百一十

處置義塚三毀淫祠十復張阿保等三百餘戶水部
以濬河奏徵郡屬雇役錢珂力言于當道疏請歲省
費不下十餘萬吳人大悅補太僕丞奏革本寺丞四
員陳備邊水利八事每屬歲解皂役率却不用凡贖
錢一毫無取及逆瑾亂政乞休歸不治家人事救賑
窮乏無吝色家居二十餘年卒

鍾湘

鍾湘字用秀興國州人爲大昌主簿鉞之長子登弘
治壬戌進士授戶部主事歷郎中擢知漳州府事會
閩廣山寇倡亂事聞于 朝命合一省兵殲之憲長

督重兵屯其境芻粟之費日不下數百金悍卒不可
法御湘區畫誓戒皆有紀度率死士先搗巢穴縛其
首惡諸脇從者給牛粟而遣之賊感泣不戰而巢遂
空海寇聞之皆就降以靖寇功 勅進階三品食叅
政俸歲饑賑濟有方活數萬口忽嬰疾篤庫有羨餘
數千兩署印僚欲私而分之湘謂之曰汝欲私此以
污吾名節耶吾九泉之下亦不汝宥悉登之簿籍擢
廣東叅政未行卒漳人像而祀之

戴書

戴書字天錫崇陽人弘治壬戌進士授南京大理寺

正出補四川僉事歷副都御史巡撫雲南上安邊疏
謂肅州爲極邊哈密爲盡境哈密土魯與回夷爲黨
其種類流寓盤據肅州之境不免爲患而罕東左衛
赤斤蒙古衛亦與哈密相隣近年漸多因徙直犯肅
州宜遵舊制畫界分境設衛鑄印制之以杜邊患
上聽其議

王良

王良字本善江夏人少警敏未束髮知向學後以病
廢學然慷慨有鉅志忽一日頓足嘆曰丈夫處世當
爲國家樹功邊境徒跼踖坐一室曷爲哉乃徒步走

京師每見人語大奇之正德改元潘中貴者受命總
鎮兩廣辟爲贊畫適雷巖諸蠻寨作亂時議出兵征
勦鎮巡檄良督軍良卽日整隊以行至則分兵巡勦
大破之斬首無算蠻熨底定捷奏授錦衣千戶還鎮
又值樂昌之變請討且徵狼兵會土官知府岑猛桀
驁不發兵鎮巡憂之顧無可遣者乃復檄良良單騎
至猛所諭以 朝廷恩威利害猛憚然懼不浹辰兵
馬雲集良協宜調度分遣精銳入搗賊巢酋衆就縛
降者以千數自後屢戰屢捷歷陞都指揮使正德丙
子擢廣東備倭授勅以行時海賊多出沒良慎守禦

嚴斥堠以待之有巨猾張徽趙十八者行掠海上計擒之餘孽尚梗良欲盡收故少緩縱卽傳有飛語良指天日誓曰良爲國家祛害寧畏此言使吾私賊賊難再獲矣無何賊果詣軍門降餘黨收捕咸伏其辜諸皆以良忠誠所感至爲頌曰靖江鏘梓焉巡按御史上其功擢中都副留守督領直隸官軍更番入衛良體貌魁碩舌上舉直抵鼻端性仁煦人有急難亟爲援賑治家有矩矱子姓克承厥志童僕皆爲盡力居官廉備倭海上不受賂遺爲留守入京時羣衛所例有贐一切罷去雖茗果亦拒弗受也

件瑜

件瑜字忠父蒲圻人正德庚午發解丁丑登進士第
試政御史臺未幾上疏病歸己卯如京師授禮部主
客司主事未幾又上疏病歸辛巳世廟御極復如
京師又上疏論天下事一曰勤聖學二曰篤親親三
曰開言路四曰敬大臣五曰選諍臣六曰去浮屠七
曰拯困窮八曰重守令九曰修武備十曰儲人才疏
上上嘉納之廼下諸司條行以本職提督四夷館
時四夷館中諸夷朝貢如哈密佛朗機者徂于闐官
所黷賄瑜以法御如朝鮮者上下秩然瑜以禮遇故

四夷聞瑜卒咸膜拜流泣甲申春 上召輔臣于平

臺于暖閣諭以尊稱之典大學士楊廷和蔣冕毛紀

力諫以爲干正統違大議上瀆 九廟內間 兩宮

未敢輕議 上意不豫者久之乃主事桂萼窺伺風

旨竊取席書張璁霍韜方獻夫諸議奏之 上下其

議在廷諸臣堅執以爲不可時廷和已去冕繼去禮

部尚書汪俊又去萼璁等諸臣至羞與爲伍遂與共

謀抗辯或摘或罷繫獄無虛日瑜私語竊嘆以世道

升降繫茲舉也吾禮官知有死而已秋七月乙亥

上降手勅改稱 孝宗敬皇帝爲皇伯考 恭穆獻

三帝爲皇考 昭聖皇太后爲伯母 章聖皇太后
爲聖母諸司俱奏以爲不可十月五日戊寅少宰何
孟春率百官伏闕死爭大學士毛紀石瑤取帖伏於
前時已近午 上命司禮監宣諭乃下學士豐熙給
事中張翀御史俞翺等于獄庚午械至午門前各殺
三十死者十有六人而瑜亦竟不起矣年四十八

王 疇

王疇崇陽人幼聰慧不羣甫三歲失母哀毀如成人
事繼母尤謹中弘治辛酉鄉試卒業南胄司業羅欽
順器重之從楊月湖遊所得益遂登正德戊辰進士

授南大理評事論駁諸法律有誣殺人者獄成力辯
其非人訾之尋獲犯於淮北衆服其神明 毅皇時
內殿災以四事規諫詞極忠惻幾逆 天威楊月湖
謂其得易之剛者擢江西僉事陞四川副使歸居家
手不釋卷愛佳山水多所題咏嘗謂文不必模擬詩
不必蹈襲發所蘊而不戾於古斯可矣性方正耻干
有司處清貧晏如也所著有石洲文集

趙邦柱

趙邦柱字安甫咸寧人蒲圻魏順甫有文名于海內
一見安甫文大奇之曰吾閩人多矣無如趙仲子遂

妻以女年十四補諸生十九舉丙子第三人已丑舉
禮闈授戶部主事監崇文門稅課九門鹽法薊州邊
餉一毫不入私橐人稱其守改吏部主事有餽玉卮
而詭言墨挺者覲其受也見而卻之內外艱服闋調
南京禮部儀制司主事在南十年買舟負米以供朝
夕改南吏部文選司郎中陞南光祿少卿陞通政右
叅議故事諸中貴以銀臺爲外府所請乞訟詞以百
數動至破人家產柱痛懲其弊關說不行會科臣有
附執政疏言相權漸輕者柱適在大司馬李坐曰此
疏殆有微指李曰何謂柱曰是欲以追四明山陰責

耳明日臺省藉藉如柱言有丞其具疏言天下事以
時宰方唐楊綰宋文彥博柱謂其焚惑視聽屏去不
奏乞歸卒嘗言仕宦須畢為歸休計以頤性命攝身
心何必車生耳哉著有草帝旨南遊草悠然齋尺牘
約言周易注疏等書行於世

汪文盛

汪文盛字希周崇陽人穎異不凡肆力于學正德辛
未進士授饒州府推官時宗藩驕恣悉繩以法構誣
逮繫日從狴犴中誦春秋三傳著爲說誣釋還原治
會姚源寇起跡德興檄往視師文盛單騎奮慨規畫

中入爲武選司主事以諫止南巡械杖于廷濱死
者數嘉靖初改車駕郎中清冗員抑璫戚蕩滌邪魘
出守福州府建三山書院罷淫祀省浮費築羅源諸
邑城處琉球諸國貢閩人德之遷浙江提學副使闡
明正學飾大真書院禁西湖冶遊訂東浙鄉約尤精
于考校品騭無毫髮爽浙人稱前後督學必以文盛
爲首憂歸服闋補陝西督學擢雲南按察使時交人
莫登庸竊據篡奪稱兵窺伺進僉都御史撫之宣布
恩威選厲鋒銳諭八寨誥五邦卒致底定進大理卿
病歸卒賜祭葬

胡堯元

胡堯元字廷猷蒲圻人夙負奇氣正德辛未進士授戶部主事以忤權貴謫高郵州同知轉瑞州府通判已卯夏運糧吳城宸濠叛間道還瑞守宋以方被擒去堯元誓死倡義密趨都御史王守仁馳奏時朝廷得奏喜甚擢瑞守無何逆黨掠瑞堯元與妻黃氏訣乃簡壯士僞稱迎降逆黨果懈伏發擒之從督府攻南昌戰于黃家渡江西平還瑞定紛亂清獄徃輕徭賦恤旱澇建書院以功擢廣西叅政以征思恩冒瘴卒桂林人祠之贈左布政使

廖道南

廖道南字鳴吾蒲圻人正德辛巳進士選翰林院庶
言士歷編修至侍講學士上命修大禮書經筵論
講多直言日食陳洪範天變陳四事又陳六事上
郊廟大禮議請撤姚廣孝配享建辟雍立帝王廟申
明大禘議皆嘉納命同考會試主順天鄉試上知
其才應制諸作每奏輒嘆賞不置賜賚親禮加於同
列將大用之中遭柄臣忌摘徽州推官數月召入卒
以忌免所著有文華大訓箴撰殿閣詞林記楚紀及
文集數十卷

馮世雍

馮世雍字子和江夏人生而穎異博極羣書過目輒不忘才華瞻麗工書及詩尤喜爲古文辭弱冠登正德己卯鄉薦第嘉靖癸未進士累官吏部郎中出守臨安徽州二郡有惠政雅志恬退家居二十年足跡不至公府人咸慕其文學而重其高潔焉所著有三石文集呂梁志行于世

朱廷立

朱廷立字子禮通山人嘉靖癸未進士授諸暨縣令拜河南道御史在道激揚達體嘗陳城朔方足兵食

二議已丑巡兩淮鹽政作商誠九以諭商御史誠九以自厲又條陳鹽法宜行事鹽遂通課益昔百七十餘萬辛卯巡按順天時元宰濁政立抗疏論列人爲之吐舌又條陳六事切中時病一時無不歛手以避者壬辰巡按四川首疏停採木之役民獲更生土番夷釀亂松潘梗貢道爲邊患上怒命將征之勅立督其事立冒險疾趨壁壘親授計將大舉兵會銜立者以他事罪立使閑住立曰天不欲我需成功乎乃賦詩院壁去有一寒豈是封侯骨萬死寧忘養士恩之句無何功成各膺爵賞錄不及立潘都御史至

衆論民謠僉謂立功當首叙將領中至有願移已賞以賞立者隨按實及摘立詩聯奏之 上嘉嘆憇賞復其官提督順天學校丁酉陞南京太僕寺卿乞歸養母母終服闋拜僉都御史丁未擢大理卿應詔陳愼刑名清吏習正士風三事戊申陞工部右侍郎已酉轉禮部右侍郎復以言去人意立弗樂立曰君子進而行其道則優游廟廊退而修其道則優游田里何往而非可樂者至家日惟課子賦詩而已嘗書四事以示同志曰君子無道人之過無沒人之善無逞忿之事無詐僞之行所著有兩厓文集行於世

謝存儒

謝存儒字懋玠蒲圻人嘉靖丙戌進士性醇樸幼通經術督學蔡潮讀其文奇之及爲行人奉策澧川王却其貺金遷給事中修陳急務上褒之會論許祭酒失職狀謫判邛州繩下以法毫不少貸舉學勸農他郡獄多屬鞫焉歷禮部郎中擢南昌府勤于職事以廉敏爲下僚先所部姦邪竊發召其長吏按問亡寃郡大治會歲旱存儒上計還大雨如注人咸忻悅以方前守嘉魚李承勛云叅政陝西檄諸郡墾田積貯兵餉不匱繕甲兵具卒乘修城堡邊聲大振民不

告擾尋陟山東布政以年饑穀貴奏省漕費過半東
土以安擢副都御史巡撫河南疏折鈞州陶器價鈞
人立石頌焉釐革祥符炬夫費以資軍食提兵守磁
州北虜不敢南牧黃河決令水工準高下開支河以
殺水勢河始亡害晉兵部侍郎卒

龔良傳

龔良傳字起岩蒲圻人嘉靖丙戌進士出使淮府一
切餽金不受主工部事濬徂徠泉源監南旺諸閘漕
運以濟歷浙江僉事金衢俗多不育女良傳令比隣
互察逐月計口有溺女者連罪風俗丕變處州張啓

元年十三繼母誣以內亂廉出其冤啓元感泣背其像祀之與憲使萬雲鵬副使徐階張岳俱以節氣相尚浙人稱爲四君子焉遷河南叅議歲大稔人相食設粥全活甚衆陟山東副使卒于官

汪宗元

汪宗元崇陽人登嘉靖進士授行人乙未遷南京工科給事中改兵部武選主事己亥改尚寶丞歷少卿乙巳遷南京太僕寺卿修馬政條例遷太常卿修太常志輯國朝名臣所建白爲經濟考庚戌遷副都御史總理河道漕流以通會柄臣嵩嗾其不附己罷爲

福建叅政尋轉右布政使外禦倭寇察民疾苦復三
運入運法歲省民金萬餘釐其賦爲正辦雜辦檄汀
建諸鹽商使畫疆而鬻又檄南塘洪塘去其冗稅鹽
利以興而商不告病後二年轉江西左布政使治如
閩政化大行無何轉應天府尹改順天晉通政使久
之避怨引例自陳致仕歸家奉母楊太夫人歡甚卒
賜祭葬所著有經濟考皇明文選春谷集若干卷

胡濂

胡濂字深甫崇陽人嘉靖己酉領鄉薦幼穎異鑽研
六經博通百家凡象緯醫卜之屬無不涉獵性至孝

居南雍夜輒焚香籲天祈母長年母疾躬侍湯藥晝夜不解帶兄弟分產泣涕者數日田地盡取礲薄者九試禮闈不第授四川定遠知縣嘗過河南有老嫗夜泣者問之以逋負官錢鬻子於人乃出橐中錢如數償之贖其子嫗拜哭不告姓名而去家人有生女不舉者亟勸之收養許爲資裝嫁之後卒如其言門下所養殘癯者數人日給之飲饌不令遠出居定遠九載廉潔愛民遷邑築城百姓安堵如故時詔采大本酉陽總督四十八廠將竣事陞蘭州知州未行遂卒山中蜀人哀之祀以祠最靈異邑有疾病往往就

才學集卷之六
禱祠下輒得愈

熊桴

熊桴字元乘其先晉陽人徙武昌嘉靖庚戌進士時太倉勸農興學禁吏民爲奸郡大治癸丑島夷入寇薄太倉城時承平日久城中無備操江都御史蔡克廉適行部太倉見寇至輒脫去而桴城守甚力寇攻五日夜城得不破御史劾桴不能斬敵當論罷太倉父老走闕下上書訟冤桴得無罷留太倉明年寇復至桴以舟師逆擊斬首數百功上陞蘇州府同知晉河南按察司僉事兵備蘇松島寇橫行江淮間會河

朔荆楚官軍擊之戰大捷事聞賜白金文綺金山軍
亂松江閉門拒之桴下令開城門檄軍還衛圍乃解
遣通判往餉軍執之桴單車走金山召諸將吏笞之
誅其首惡事遂平在吳十二年從將吏誅賊大小三
十餘戰斬首一千四百有奇建崇明福山洲沙柘林
吳松江五城開楊林瓦浦虹江白茆四渠增補田賦
二千二百有奇陞雲南叅政會女官素儀爲亂幕府
不能擒服桴以冠帶予之令攝郡遂降尋遷陝西按
察使故御史中以大計左遷山東叅政會通河決鑿
渠築堤壩導三河水亡害以功進秩二品轉浙江右

布政海寇曾一本反擢僉都御史巡撫廣東馳至南
雄一本解圍去因條上平寇四策乞餉金五萬皆得
請拊循士民戒守令勿擾行保甲團練法造戰艘百
有六十發千金賑貸罷久通漁鹽課區畫周悉乃興
師平嶺西新會藤洞諸盜斬首二千九百尋擊一本
於潮海走之入閩疏請置二縣報可仍檄安南夷備
境上勿令一本南一本分據馬耳嶼牛田洋則檄閩
兵圍之斬首三百有奇一本復誘日本王丘古入寇
惠州城把總周雲翔殺叅將耿宗元攻城急桴縱火
擊之雲翔敗走遂行反間于丘古所得雲翔等誅之

才幾獲丘古盡平其黨復親督諸將進攻一本伏誅
桴卒于軍 上以平寇功進副都御史贈兵部侍郎
賜祭葬

魏 裳

魏裳字順甫蒲圻人十六試諸生高等是時廖學士
雅自負博而辨又貴倨也所引說經史連杜諸生口
獨順甫避席奏對不窮又所請益時出其表學士自
失曰何物少年乃爾足三冬耶諸生亦大喜謂何渠
使五鹿少府角折也蓋又十餘年而舉鄉試又四年
而成進士授刑部主事與李于鱗王元美輩游而好

爲古文詞順甫自以材不稱諸子益刻苦晝從曹中
治司空城旦小間卽開卷非夜分弗釋也會母卒歸
服除當補三月餘不報人或謂順甫不當有所造請
耶順甫笑曰我一欵段馬不數步而僵且歸矣亦不
知何門可造請久之復補刑曹順甫凡三爲其司主
事同舍郎皆後進据其上而其於推案文法無害咸
拱手矣已稍遷員外郎郎中最後爲濟南知府時于
鱗已棄官里居一切謝客順甫三及門而不見以一
蒼頭報謝人或謂曰與若部民胡倨也順甫再往候
之于鱗乃出飲談詩甚懽順甫性高簡亡所過從所

過從必于鱗卽于鱗亦無它客也以是竟其任時或
謂順甫文章士心易之然其爲刑部甫蒞事而寬大
同叅議獄爭于其長及執政莫能難也決大獄江左
察其情稍有間者卽爲讞語著於牘以授御史於守
濟南益敏練有聲是時寇蜂起齊魯間順甫畫策誘
誅其渠率數人而散其黨使歸耕曰汝第爲善不汝
問也所屬邑獨章丘腴而其民最苦徭賦又皆爲豪
所侵順甫奮身往悉逮豪寘之理於是伏田盡出而
小大戶咸得足食亡困徭矣已遷爲山西按察司副
使分巡冀南道順甫爲濟南三歲所得臺使薦凡六

最後一木當其意竟以指摘去副使歸是時中憲分
尚無恙順甫自喜曰吾今乃得稱人子矣所以共奉
娛悅百端念其二庶弟弱悉出橐中裝置上產三百
分予之又爲置良人室曰及吾父而俾之立也已教
授里中諸生咸彬彬北面稱弟子久之中憲公卒順
甫艾矣而毀瘠如不欲生時汪伯玉鎮楚念欲構楚
史不就亡能當之者以聘順甫及豫章余德甫德甫
有它故不就順甫旣服除乃卽家開局集諸郡博士
掌故手裁定之而先上其草伯玉伯玉讀序傳雜論
而喜曰班荀儔也所爲楚史凡七十六卷數十萬言

是時楚人何某亦爲楚史成俱上之臺或言二史當
合者順甫意不懌曰五色有可合也者而縑白不可
合也毋已則寧篋吾史乎順甫疾所繇心血耗則以
楚史故旣屬續謂次子彬如曰數盡矣夫詩與文孰
叙次哉屬之元美遂瞑時年五十六順甫所習自經
典子史諸天官卜筮龜策地理家言靡不精究其詩
最善近體沈鬱勁壯有河朔風於文尤精刻削法森
森立不以藻競非夫治飾靡辭爲市門粧也者其人
則溫溫長者而性持介於取予辨毫髮不苟故居官
居家無得而間焉

劉師穎

劉師穎字方回興國州人生而穎異年十歲能工舉子業十五試輒冠羣士弱冠領鄉薦舉嘉靖癸丑進士累官兵部武選司郎中爲人博雅有規度性至孝初上春官時業登途矣忽念母老遂辭歸其爲武選清戎籍督武學閱馬政咸井井然條理同舍讓其能比以母老告還鄉里惟杜門侍養絕不與有司交際喜施與里人貧不能婚喪者每捐所有資給焉徵時嘗鬻友人田比貴卽折券以田還之不復責其直士林以此稱爲長者居亡何卒年四十有二

補遺

孟廷柯

孟廷柯字培之武昌人正德辛未進士任大理寺副
與翰林脩撰舒芬等諫止武宗南狩謫戶部照磨
嘉靖初擢四川僉事轉西叅議雲南叅政

方震

方震武昌府嘉魚人倜儻有謀畧正德中大寇起震
奮身協謀誘二寇殺之擣其巢寇平震亦以勞卒有
司以聞贈府檢校行翰林院撰文祭之復其家

汪宗伊

汪宗伊字子衡湖廣崇陽人南吏書文盛子嘉靖戊戌進士授浮梁知縣有政聲入爲兵部主事歷郎中以執論嚴鵠事忤時宰自免歸隆慶初起南京吏部郎隨晉尚寶司卿轉太常光祿卿陞應天府尹仁心爲質而吏事精敏綜覈無遺條畫上江二縣徭賦每歲約省萬餘金城居坊民里甲凋敝令代供諸司歲費至六七千金破產者相屬屢經撫按裁節改爲顧役立碑二縣歲徵二千金于庫官收吏支而諸司胥至縣不能給復責坊民囊金自用所私常溢額銀之半竟裁爲九百金責報循環同里甲賦役具疏上

聞得報允于是濫差不及而九百金寬然有餘矣坊
民願以紓爭立生祠祀之廉察有威稜裁斷出已吏
胥不能得一錢多遞去者遞大理卿轉南吏部侍郎
晉戶部尚書卒

吳國倫

吳國倫字明卿原貫嘉興以祖戍湖廣興國州遂家
焉生而穎異善屬文年二十六省試第一次年登進
士是時都下有七才子齊李攀龍謝榛吳王世貞宗
臣徐中行南越梁有譽而國倫則楚才也以著述自
喜辭甚簡神閒歷宦燕楚閩粵貴竹大梁足跡半天

下以故詩文獨雄年五十四謝方岳歸卧林下所著有甌甌洞稿若干卷行于世

孟養浩

孟養浩號五岑湖廣咸寧縣人萬曆癸未成進士授行人戊子選兵科給事中辛卯陞禮科右本年主考福建陞戶科左壬辰建言廷杖爲民庚申起陞太常寺少卿本年陞南右僉都辛酉陞刑部右侍郎報至而卒養浩素精五星居嘗謂辛酉正當陽九之阨若未轉官或可再延邸報一至無疾而卒功名死生信自有數而先見亦神矣

郭正域

郭正域號明龍江夏縣人萬曆癸未成進士改庶吉士丁憂丙戌授編脩丁憂壬辰復除原官乙未陞中允丁酉陞左諭德戊戌陞右庶子本年陞南京祭酒辛丑陞詹事壬寅掌翰林院本年加陞禮部右侍郎時楚獄事起正域習聞假王之說有意深求楚藩當事以爲日已久且事體重大止分別首從擬法處各宗以完局而楚王幸無恙無何妖書事起波及正域則又揣疑之過矣正域幾不能免怏怏以歸久之事白而正域品望籍籍海內未及柄用而卒

漢陽府

張敏

張敏漢陽人永樂中爲工部司務衆推其才陞知雲南曲靖軍民府在任遠夷懷服秩滿進陞陝西苑馬寺卿後致仕卒

戴金

戴金字純夫號龍山一號三難漢陽人正德丁卯舉于鄉甲戌成進士授蘇州府推官會庫亡拆糧銀若干兩長吏日考掠守庫者竟無驗金乃遍召諸糧役於庭陰以一牌用濃硃塗之梘寘後堂暗室中語之

日而輦以糧役役於官乃茲糧銀亡欲避咎弗獲也
余有牌在後堂甚神能辨盜盜手摩之則騷然有鳴
聲衆如指諸摩出視其手皆硃中一人獨不硃立詰
之遂首服還所盜金而守庫者具得釋其訊獄神明
奇中若此外艱服闋除撫州府推官嘉靖癸未授廣
西道監察御史乙酉奉命理兩淮鹽政乃調奏便
宜酌處鹽法十二事節費省緡得羨銀六十八萬佐
邊餉丁亥被命按川蜀蜀去京師遠與滇隣滇賊
安銓者誘其黨構爲亂攻掠郡邑蜀民騷動事聞廷
議興兵誅之金念蜀方旱疫洊臻民殲死者道相望

儻軍興給餉是寇未殄而民殲矣乃抗疏乞罷兵躬
入險阻撫平之已復疏請帑金二十萬通商市糴具
藥給種全蜀之民卒免溝壑辛卯陞太僕少卿督京
營馬政左遷河南布政司右叅議轉浙江左叅議陞
按察司副使內艱服闋除江西按察司副使兵備九
江戊戌陞貴州布政司叅政陞右僉都御史巡撫順
天命選將練兵闕士日奮未踰月邊兵與虜遇遂乘
勝斬首級奪獲馬器以歸己亥改秩南京太僕寺少
卿庚子陞應天府府尹辛丑 天子將新太廟擢金
右副都御史總制川貴按採西南異材大工事竣入

爲大理寺卿陞右都御史掌寺事如舊甲辰 廷試
充讀卷官冬十月陞兵部尚書疏辭不允金被命感
激首陳安攘大計十二事曰甄別武材以責成效曰
稽察將領以警勤惰曰充實缺伍以備攻守曰選練
民兵以裨行陣曰修復陣車以禦勅敵曰慎養馬匹
以利騎戰曰修理關隘以固藩屏曰慎重墩臺以明
烽火曰嚴謹盤詰以杜奸細曰優處還民以收亡叛
曰厚養死士以探虜情曰因地選兵以備調度 上
省覽嘉閱謂戴尚書賢可屬大事命斟酌舉行數月
以言致仕去

陳昂

陳昂漢陽人以明經中鄉舉擢廣東道監察御史後遷山西按察司僉事昂言事敏辨詳晰深於國體其所論別是非可否卽素具大辯才者不能折也然而陽喏陰忌者衆矣故卒不能且行其志云

陳傑

陳傑漢川人以明經中鄉舉歷任勤能長於治體至晰民隱瘼必辨其利弊所在而興革之若夫委悉周至不啻善治生者之綜理家政也故所在民德之如父母焉累官江西布政司右叅政卒于官

蕭良有

蕭良有號漢冲漢陽人弱冠舉湖廣鄉試庚辰會試
一名一甲二名授翰林院編脩丁憂甲申復除原職
丁亥陞脩撰戊子主考浙江陞右春坊右中允管國
子監司業事壬辰陞洗馬充日講官主考鄉試順天
乙未陞國子監祭酒本年准回籍己亥致仕卒爲文
盤空變化莫可端倪與弟良譽並以文章顯同時舉
進士稱爲三楚二難良譽以戶曹郎出守寧國望之
清凜逼人卽而就之藹然春溫可掬在郡四年未嘗
厲聲色以拒人而士大夫自無敢以私謁請者每朔

望群士子于學宮講析書義旁及民間疾苦至午甫退月再會會必五藝拔湯公賓尹于諸生中每指以語人曰湯生文脉酷似家伯兄異日名第定相當也後果適符而數年之內魁鄉會兩榜者纍纍相接今郡人祀于四君子祠焉後官至大叅兩任學憲衡鑑超異卓絕一時未幾卒人以不得究其所用甚爲悼惜云